

三河縣志卷之二

形勝志

古者營邑必度山川亦以天地位而高卑陳山川聚而形勝固于以阜財用足衣食水土衍而民力溥也三河在京畿東環山帶水夙稱巖邑而車馬往來冠蓋相望又為左輔極衝之地為之考核山川備詳形勢庶為司牧者知四境險易之宜衝僻之分而且斜陽古道立馬摩挲則古蹟美景又憑眺者所宜識及也志形勝

三河縣志

卷二

形勝

山川

廣輿記洵巖邑也居庸障其背洵如襟其前山海扼其左紫荆控其右雄山高峙流河如帶

畿輔通志紀三河志曰山惟華惟靈水曰洵曰

洵

靈山 縣北十五里

明一統志靈山之麓三面有泉清冽可愛

華山 縣西北四十里

石城山 即虎耳山 縣西北四十里上有石城故

名

按畿輔通志稱石城山在縣北五十里蓋指縣

極北境之石城山非即兔耳山旁小山也又摺

捲山亦有石城形土人亦稱曰石城是

石城山凡有三矣

盤龍山 縣西北五十里舊名旁立山建

行宮後改新名

狼山 縣西北三十里

聖水山 縣西北二十五里

三河縣志

卷二

形勝

二

明一統志山上有聖水泉可愈眼疾

長安客記三河縣西北山上有泉汲以洗目可

療目疾因名聖水

陀山 即寶陀山 縣北六十里 **按**名勝志畿輔通志皆作駝山

水經注五百溝水出駝山北東經鞅城南入河

河

孤山 縣西五十里上有寶塔孤山廟

畿輔通志四 卷一 峯挺秀故名

馬鞍山 縣西北二十五里

鳳凰山 縣西北五十里

名勝志 靈山華山聖水山駝山俱在縣北靈山

去縣治十五里三面出泉居民以利灌溉形勝
記所謂北倚靈山者是也又十五里為華山一
名兔耳山又十五里為駝山即香河縣駱駝港
之源水繞駝山而出故名其地又有石城青梁

諸山口 **圖** 名勝志里
數俱不符

王魁山 縣西北五十里倚山庄名仍此

嶠山 縣東北五十里

三河縣志

卷二

形勝

清涼山 縣北五十里

蔣福山 一作蔣府山 縣東二十里上有龍潭禱雨輒

應 **圖** 畿輔通志作
縣東北十五里

拷佬山 縣北三十里山前有靈巖寺又有砥

堂寺

掀山頭 縣北十五里

堡子山 縣東十五里

圖 邑有兩堡子山一在縣西北五十里

八里嶺 縣東十五里

齊家木 縣東十五里

段家嶺 縣東二十里官道旁

洵河 縣北二里許

洳河 縣東五里

洳河即錯河一名七渡河又名黃頰水

小河 縣北十五里

鮑邱河 在縣西即白河之分流也亦曰潮河

不老淀 縣南四里

諸河原流詳河渠不敘入

三河縣志

卷二

形勝

四

古蹟 附

河邑古蹟希少然而故城舊館寶刹名莊雖世遠代湮而片石常留故址尚在與夫名人選勝逸士尋幽百世而下有誇為盛事者乃知地以人重而室惟德馨也附識山川後以俟覽古者採焉

古城 縣東三里洵邑之舊城也

大興



臨洵城石趙所置亦曰臨渠城晉永

和六年慕容霸伐趙收安樂北平兵糧與其主

得會于臨渠卽此城也後魏廢

水經注 洹河一名渠河東逕臨洹城北屈而歷其城東

城 舊城在今縣東三里洹河南

畿輔通志 故城在三河縣東南石趙築城于此

絳城 縣西北三十里相傳元耶律英公城

水經注 洹河南徑絳城東而南合五百溝水

唐會莊 在靈山北

屯政考 縣多曠土宜耕屯有唐會莊為昔時墾

三河縣志 卷二 形勝 五

植之址

夏澤 在三河縣西

水經注 鮑邱水南流逕潞城南又東南入夏澤

澤南紆曲渚一十餘里北佩謙澤渺望無垠今

考三河縣古潞縣地縣西三十里名夏店舊有

驛鮑邱水環其下疑夏店之名因古夏澤其東

彌望皆陂澤與水經注合

五槐公館 在縣西三十里夏店舊有驛今廢

舍利塔 在縣西門外金正隆元年顯武將

孟勝建傳藏佛牙舍利子於內高十三級康熙
十八年地震頂簷四墜層級難分而塔身岐立
如故

鏡兒淀 在蔣福山居環山之中有水時積水
一泓下有滲泉登盤谷諸峯俯觀如鏡水涸則
居民耕之

古馬房 在馬房莊北爲遼金元明牧圍之所
至今基地猶存

無樑閣 在焦園東山之麓疊石成塔不施樑
木三殿皆然

石城 在兔耳山頂周圍砌石爲城不知始於
何年

遼章宗陵 縣北五十五里舊志云前有兩小
山並峙上有播鼓臺並載明一統志及

國朝纂修畿輔通志

按顧炎武日考遼無章宗其一代諸帝亦無葬

三河者景遍訪境內無址可考但舊志相沿未
便薙芟姑識之以俟博洽者

錯橋 縣東五里一名草橋今圯

八景附

三河潞水西環盤山東拱衆流交會於南羣峯
聯峙於北旣嶽崒以競翠復蕩漾而爭奇疆土
寬平泉石鍾山川之秀閭閻繁聚旗民樂耕鑿
之天用詳八景以表名區

靈泉漱玉 靈山之麓三面有泉或從石竇或
自沙垠積流成溪居人導入陂田巔卓浮圖腰
藏梵宇凭軒遠眺惟見野橋村落掩映層林瓜

三河縣志

卷二

形勝

七

圃蔬畦紆迴曲澗恍如身在畫圖中也

聖水流舟 泉在蕨山幽谷從洞中石乳滴下
縷注澄潭僅供數人之汲雖盛夏不涸其性清
冷其味甘冽相傳能愈目疾云

陀嶺春雲 縣北重山綿亘百餘里嵐氣上蒸
蒼蔚成雲若屏若障森列半空不可名狀春時
遇雨則峯巒半隱遇晴則巖岫分明居民覘此
以卜耕耘之候

月池秋鷺 縣北胡家橋有水渟泓可半頃其

形如月菰蒲菱芡交橫掩映至秋則鷗鷺羣飛
下上以適其性焉

七渡晴瀾 城東五里錯河之官渡在焉水遠
流長錦鱗游泳當夫天氣清明微風澹蕩釣叟
適垂綸之興行人欣一葦之杭雲影波光四望
皆成勝槩也

孤山挺秀 山自平地拔立突聳一巒旁無附
麗上有浮圖數仞登臨四顧平原曠野阡陌如
繡遙指盤山白塔諸峯及靈山寶塔參差對峙

三河縣志

卷二

形勝

八

北兔歸樵 縣北有山形如兔耳其上林木深
蔚其下村舍環居雖樵牧不盡在此山而必由
此爲歸村之徑石勢峻嶒山嵯屈曲當夕陽西
墜清風徐來樵歌下上與巖石之聲相應

南塘落鴈 邑南積水數十頃下通錯河一名
不老淀土人呼爲南港其中洲渚多生紅蓼青
莎因塘面遼濶繒繳不施鴻鴈飛鳴聲聞數里
之外

論曰山川爲都邑之表故雄鎮巨澤紀之職方

望景觀泉形之篇什凡以表厥勝也三河阻山
帶河疇平野濶其形勝有足觀者更邀

宸蹕常臨

行宮鞏建輪蹄輻輳冠蓋交馳誠

左輔之通衢東道之勝境也若夫春雨草堂興
懷杜甫秋風五柳恍遇陶潛懷古者低回留之
不能去豈僅如宋廸之圖八景作平遠觀已哉

三河縣志

卷二

形勝

九